



U. B. K.

Broj: 01,02,03,03/11-05-1-239/19
Sarajevo, 29. 3. 2019.

Izvještaj

sa 16. konferencije predsjednika parlamenata zemalja članica Jadransko-
jonske inicijative (JJI), Budva – Crna Gora,
18. i 19. mart 2019. godine

BOSNA I HERCEGOVINA
PARLAMENTARNA SKUPŠTINA BOSNE I HERCEGOVINE
SARAJEVO

PRIMLJENO: 12-04-2019

Organizaciona jedinica	Klasifikaciona oznaka	Redni broj	Broj prijava

Parlamentarnu skupštinu BiH na 16. konferenciji predsjednika parlamenata zemalja članica Jadransko-jonske inicijative predstavljao je zamjenik predsjedavajuće Predstavničkog doma PSBiH Nebojša Radmanović.

Na Konferenciji su najviši zvaničnici parlamenata devet država članica Jadransko – jonske inicijative razgovarali o povezivanju parlamentarnih tijela, koja, kako su istaknuli domaćini iz Skupštine Crne Gore, predstavljaju značajan resurs jačanja saradnje u prioritnim oblastima za države regiona.

Nakon uvodnih obraćanja ministra vanjskih poslova Crne Gore Srdana Darmanovića i generalnog sekretara Jadransko – jonske inicijative ambasadora Giovannija Castellanete o ovoj temi na skupu je govorio i gosp. Radmanović.

Konstatirajući u svom obraćanju da je svaka regionalna inicijativa snažnija i uspješnija ako ima aktivnu podršku parlamentarne dimenzije, Radmanović je naveo da su kroz Jadransko – jonsku i druge regionalne inicijative kojima su obuhvaćene države jugoistočne Evrope zabilježeni brojni pozitivni primjeri djelovanja parlamentarne diplomatije.

Radmanović je upozorio na to da resurs koji predstavljaju parlamentarci i parlamentarna tijela nije dovoljno iskorišten, te je, s tim u vezi, naglasio da bi od nesumnjive važnosti bilo uspostavljanje saradnje parlamentarnih tijela u čijem su fokusu vanjska trgovina i carine, kao i saobraćaj i komunikacije, što, kako je rekao, jesu oblasti koje predstavljaju prioritete Jadransko – jonske inicijative.

Za države koje su na putu integriranja u Evropsku uniju (EU) i koje Jadransko – jonsku inicijativu vide kao instrument za stvaranje jedne nove, prosperitetne, evropske makroekonomske regije, razmjena ideja i iskustava u okviru saradnje parlamentarnih tijela bila bi od ogromne važnosti za podsticanje bolje i kvalitetnije infrastrukturne povezanosti, te lakšeg protoka ljudi, robe i kapitala unutar država članica Jadransko – jonske inicijative.

U usvojenoj Zajedničkoj izjavi, najviši zvaničnici parlamenata zemalja članica Jadransko – jonske inicijative naglasili su važnost nastavka saradnje parlamenata regiona za realizaciju projekata podrške integraciji država zapadnog Balkana u EU, te pozvali evropske institucije da ojačaju svoju političku i finansijsku podršku provođenju projekata iz Strategije EU za Jadransko – jonsku regiju (EUSAIR).

U Zajedničkoj izjavi istaknuto je da sektor turizma postaje sve značajniji faktor ekonomskog prosperiteta jadransko - jonske regije i Evrope te da je intenzivnija regionalna saradnja u ovoj

oblasti ključna za ispunjavanje ciljeva iz EUSAIR-a. S tim u vezi, sve državne, regionalne i lokalne vlasti, privatni sektor i nevladine organizacije pozvane su da nastave da razvijaju sinergiju između strategija održivog turizma i kulturnih sektora, uključujući inovativne usluge i poslovne modele, s ciljem podsticanja održivih, kvalitetnih kulturnih i turističkih ponuda i revitalizacije urbanih i ruralnih područja.

Zemlje učesnice Jadransko - jonske inicijative ohrabruju se da poboljšaju regionalnu dimenziju saradnje i razmjenu najboljih praksi u oblasti turizma, a potvrđuje se i politička podrška aktivnostima koje se provode na državnom, prekograničnom i regionalnom nivou, a koje se odnose na razvoj u sektoru turizma i zaštitu kulturne baštine u jadransko-jonskoj regiji.

Zemlje učesnice Jadransko-jonske inicijative u Zajedničkoj izjavi podstiču se na to da promoviraju zajedničke turističke proizvode s ciljem pozicioniranja jadransko - jonske regije kao jedne od vodećih turističkih destinacija u Evropi. S tim u vezi istaknut je i značaj unapređenja infrastrukture koja, kako se navodi u Zajedničkoj izjavi, ima suštinsku ulogu u povećanju pristupačnosti i povezanosti regije.

Zamjenik predsjedavajuće Predstavničkog doma Parlamentarne skupštine BiH (PSBiH) Nebojša Radmanović sastao se, na marginama 16. konferencije predsjednika parlamenata Jadransko – jonske regije, s predsjednicom Narodne skupštine Republike Srbije Majom Gojković.

Tokom sastanka razmijenjene su informacije o aktuelnoj političkoj situaciji u dvije susjedne i prijateljske zemlje. Gospodin Radmanović naglasio je da su u BiH, nakon konstituiranja i izbora rukovodstava oba doma PSBiH, stvoreni svi uslovi za izbor novog Vijeća ministara BiH, te izrazio uvjerenje da će taj proces biti okončan u najskorije vrijeme.

Zajednički je konstatirano da su odnosi BiH i Srbije dobri, dinamični i sadržajni, kao i to da se odvijaju na svim nivoima vlasti. Posebno se razgovaralo o nastavku međuparlamentarne saradnje, koja je, kako je rečeno, ojačana prošlogodišnjom posjetom svih članova kolegija oba doma PSBiH Narodnoj skupštini Srbije. S tim u vezi, najavljena je mogućnost da se u narednom periodu potpiše sporazum o saradnji dva parlamenta.

Naglašeno je da je potrebno intenzivirati ekonomsku saradnju i pojačati obim robne razmjene između dvije zemlje.

Gospodin Radmanović razgovarao je i s predsjednikom Skupštine Crne Gore i domaćinom 16. konferencije predsjednika parlamenata zemalja članica Jadransko – jonske inicijative Ivanom Brajovićem.

Tokom sastanka konstatirano je da između dvije zemlje nema otvorenih pitanja, te naglašeno da je sporazum o granici, koji su BiH i Crna Gora potpisale, dobar primjer rješavanja ovog pitanja za sve susjedne zemlje u regiji.


Naglašeno je da prijateljske odnose dvije susjedne države treba iskoristiti za dodatno unapređenje ekonomske saradnje, posebno u oblasti turizma. S tim u vezi, kao prioritet je istaknuta izgradnja puta Foča – Šćepan polje s jedne i Plužine – Šćepan polje s druge strane, kao i mosta na Tari. Također je istaknuta potreba da se radi na boljoj prohodnosti granice između dvije zemlje, posebno u ljetnoj turističkoj sezoni.

Razmijenjene su informacije o političkim prilikama u BiH i Crnoj Gori, kao i o procesu evropskih integracija u kojem učestvuju obje zemlje.

Konferenciji koju je organizirala Skupština Crne Gore, osim zamjenika predsjedavajuće Predstavničkog doma PSBiH Nebojše Radmanovića, prisustvovali su i: Enida Mehmedovski iz Sektora za međunarodne odnose i protokol Sekretarijata Parlamentarne skupštine BiH, Zoran Žuža, šef Odjela za informisanje Parlamentarne skupštine Bosne i Hercegovine i Nataša Čabak, prevoditeljica u Sektoru za međunarodne odnose i protokol Sekretarijata Parlamentarne skupštine BiH.

Izveštaj pripremila:

Enida Mehmedovski




Izveštaj odobrio:

Zamjenik predsjedavajuće

Predstavničkog doma PSBiH

Nebojša Radmanović



Dostaviti:

- Kolegiju Predstavničkog doma PSBiH
- Kolegiju Doma naroda PSBiH
- Kolegiju Sekretarijata PSBiH
- Komisiji za vanjske poslove Predstavničkog doma PSBiH
- Komisiji za vanjske i trgovinsku politiku, carine, saobraćaj i komunikacije Doma naroda PSBiH
- Sektoru za odnose s javnošću Sekretarijata PSBiH
- Sektoru za međunarodne odnose i protokol Sekretarijata PSBiH

Kopija: Ministarstvo vanjskih poslova BiH